



Pocjts cjacaris!

Ca di pôcs minûts e partîs la mail cu **la Conte dal Mes di Març**, il regâl che nô di Contecurte o fasìn ai nestrîs iscrîts ae Liste di Contecurte!

E come ogni mêś us lassin l'incipit de conte, par stiçâ chei che ancjemò no son iscrîts te liste a iscrivîsi e ricevi il regâl.

No us disìn cuâl che al è l'argoment de conte di chest mêś, ma o podês forsit intivâlu savint che la storie e je ambientade in Cjargne e che cheste imagjin al è un dissen di Jacum, un dai nestrîs piçui aiutants di Contecurte. Dentri de conte o podês cjatâ ancje il dissen di Ricart, l'articul de nestre Coghe, une vore interessant, un biel pôc di cjargnel curât dal nestrî Cramâr Pablo e, come simpri, la cuvierte metude adun de Sartore partint di un dissen dal Ostîr.

Il titul de conte? Boris... e ve chi cemût che e scomence...

Al è un moment, te vite di un om, dulà che la etât si mostre in clâr, saltant fûr des andronis scuris dal cuotidian. Ti si pare denant, ti cjale in muse, cualchi volte cun gracie, plui voltis cun malegracie, e ti oblee a scoltâ ce che e à di dîti. Tu puedis ben fâ fente di vê premure, come che si fâs ator par Udin, cui neris che a cirin di venditi un gjornâl o cun chei pucefadiis plens di morbin par fâti meti une firme - e scuediti bêçs - par cheste o par chê altre associazion. Cun jê, la etât, no tu puedis fâ di mancûl di bonâ il pas e fermâti, parcè che e jemple il troi intîr dal to doman.

«Cjalimi chi, trop che o soi cressude! Varessistu mai dite che o sarès diventade cetant grande in cussì pôc timp? No mi dîstu nuie?»

Ben o mâl, simpri chest al è il so discors.

E alc, in chel moment, ti tocje di rispuindîji, se no a peraulis, almancûl cul pinsîr. E daspò, al sarà simpri plui difîcil platâ intun cjanton de memorie ce che tu i âs rispuindût.

Se vês voie di lei il rest, iscriveîsi lâ in bande sul sît o chi sot sul telefonut!

Mandi a ducj!